


Dragi prijatelji/ce,

Predstavljamo vam **februarsko** izdanje mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine koja za sada broji **178** organizacija i **113** pojedinaca iz **74** mjesta BiH.

Bilten izlazi na bosanskom-srpskom-hrvatskom i engleskom jeziku.

Sadrži informacije o radu ORC-a Tuzla, mjesečne aktivnosti omladinskih organizacija, grupa i pojedinaca - članova Omladinske mreže BiH, njihove planove za naredni period, te ostale značajne informacije kao što su pozivi na konferencije i seminare, donatori, školarine, stipendije i sl.).



Ukoliko želite da budete na mailing listi za naredna izdanja mjesečnog biltena, ako imate pitanja ili sugestije, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

<http://www.omladina-bih.net>

Uživajte u čitanju!!

SADRŽAJ

| | | |
|--|-------|-----------|
| Aktivnosti u februaru 2015. | | 2 |
| Planovi za mart 2015. | | 4 |
| Aktivnosti dijela članica mreže | | 5 |
| Novi članovi | | 15 |
| Informacije / donatori / pozivi | | 16 |

AKTIVNOSTI ORC/ hCa U FEBRUARU 2015.

✚ OMLADINSKA GRUPA ORC TUZLA

► Mladi, moderna umjetnost i društveni aktivizam

Od 20. do 22. februara 2015. godine u Sarajevu je održan Civitasov seminar “Mladi, moderna umjetnost i društveni aktivizam”, kojem je prisustvovalo 36 mladih osoba iz svih krajeva BiH.

Cilj seminara bio je naučiti kako kroz umjetnost i aktivnost na društvenim mrežama ukazati na probleme u lokalnoj zajednici i kako na kreativan način doprinijeti njihovom rješavanju. Osim prisustvovanja radionicama, učesnici su u svojim grupama imali zadatak da odaberu globalan problem koji se manifestuje i u BiH, te da njegovo rješenje predstave igrokazom u trajanju od 5 minuta.



Zadatak svih grupa nakon završetka seminara bio je da naprave snimak od 60 sekundi kojim će pokazati kako umjetnost može pomoći rješavanju problema u lokalnoj zajednici. Svi video uradci učestvovali u takmičenju “Izazov 60 sekundi”, u kojem će o pobjedniku odlučivati broj lajkova, a pobjednici postaju mentori na Civitasovoj ljetnoj školi.

Članovi ORC-a koji su prisustvovali seminaru su: Adnan Mujanović, Lejla Zonić, Vedran Mitrić, Kemal Nedžibović i Ivana Šuster.

► Studijska sesija Budimpešta



Haris Selmanović, član Omladinske grupe Omladinskog resursnog centra Tuzla, je od 22. februara do 1. marta prisustvovao studijskoj sesiji u organizaciji OBESU-a (Organizing Bureau of European School Student Unions) i Vijeća Europe.

Sesija je okupila 36 srednjoškolaca, lidera svojih učeničkih unija i organizacija širom Europe, a Haris je zajedno sa Emirom Zulejhićem, kolegom iz Upravnog odbora Asocijacije Srednjoškolaca u BiH, predstavljao istoimenu organizaciju i Bosnu i Hercegovinu.

Glavna tema Sesije je bila ksenofobija, te razvijanje akcionog plana kojim će organizacije koje su članice OBESU-a djelovati na eliminisanje ksenofobije i govora mržnje iz europskih škola. Imajući u vidu da je Bosna i Hercegovina jedina država na svijetu sa „dvije škole pod jednim krovom“, nadamo se da su Haris i Emir bili motivirani tokom trajanja Sesije, te da će stečena znanja implementirati u svoj rad.

► Održan prvi modul Liberalne akademije BiH

U Tuzli je u subotu, 28. februara 2015., u prostorijama Dramar centra, održan prvi modul Liberalne akademije Bosne i Hercegovine. Riječ je o jedinstvenom modelu neformalnog obrazovanja koji se zasniva na liberalnim idejama, sa fokusom na ekonomski liberalizam. Modulu edukacije prisustvovalo je oko 30 mladih osoba.

Učesnici edukacije su imali priliku slušati o pojmu liberalizma, te zajedno sa Admirom Čavalićem, predavačem i direktorom Liberalne akademije, raspravljati o nekim od aktuelnih liberalnih pitanja današnjice. Nakon toga, održana je radionica na temu ekonomskog liberalizma, uz raspravu o aktuelnim ekonomskim prilikama u Bosni i Hercegovini. U okviru date teme raspravljalo se o mogućim fiskalnim reformama u državi, značaju EU inicijativa, te ostalim zahtjevima međunarodnih institucija.



Liberalna akademija nastavlja sa aktivnostima tokom čitave godine, pružajući priliku učesnicima da preko niza događaja u organizaciji udruženja "Multi", sakupe dovoljan broj bodova kako bi ostvarili pravo na diplomu date akademije. Cilj Liberalne akademije je da se educiraju i osnaže bosanskohercegovački ekonomski liberali kako bi pokrenuli nužno potrebne liberalne reforme u BiH.

Omladinsku grupu su predstavljali Muhamed Sulejmanagić, Zamire Sokoli, Merita Sokoli, Zada Bešić, Nedim Osmanović, Dijana Osmanović i Slobodan Blagovčanin.

► Team building activity



Omladinci su 8. februara na „Banji“ ujedinjeni i još jedan put iz Tuzle poslali poruku zajedništva mladih različite vjere, pripadnosti, različitih mišljenja i opredjeljenja.

Sa drugarima iz Evropskog parlamenta i iz Asocijacije srednjoškolaca okupili su se i kroz lijepo druženje, smijeh i igru prepustili se zimskoj čaroliji. Krajnji rezultat ovog druženja bio je - Snješko Bijelić.

Mir - ljubav - zajedništvo - zdrav način života - bijeg od tehnologije bio je „light motiv“ tog dana. Najznačajnija tačka ove aktivnosti jeste da su članovi omladinskih grupa ostvarili kontakt i dogovorili dalju zajedničku saradnju.

► Sastanci sa predstavnicima EUFOR-a u Bosni i Hercegovini

U srijedu 25. 2. 2015. godine u Tuzli održan je informativni sastanak sa predstavnicima EUFOR-a. Na sastanku se pričalo o aktivnostima članova, i uopšte o samoj grupi „Omladinskog resursnog centra“, kao i o projektu „Date The State“, te se razgovaralo o pogledima mladih na politiku, obrazovanje i sl. u Bosni i Hercegovini.

Takođe, svi prisutni članovi su rekli nešto o sebi i iznijeli svoje lično mišljenje o stanju u BiH. Na kraju sastanka smo iznijeli prijedlog za buduću saradnju sa EUFOR-om u jednom od projekata na šta smo dobili pozitivan odgovor.



► Sastanak sa učenicama Osnovne Škole „Jala“

U petak, 27. februara 2015. godine u posjetu Omladinskom resursnom centru Tuzla došle su učenice Osnovne Škole „Jala“, u cilju traženja pomoći pri realizaciji njihovog projekta. Problem učenika OŠ „Jala“ ogleda se u tome da u neposrednoj blizini njihove škole postoje ulice na kojima nema semafora ili kružnog toka, kao ni bilo kakvih znakova koji upućuju da se u blizini nalazi škola.

Oduševljeni njihovom zainteresovanošću za probleme od javnog značaja, ponudili smo im svu pomoć u daljoj realizaciji projekta, predložili im dalje smjernice i uputili nekoliko savjeta kako bi njihov projekat u što kraćem roku bio realizovan.



✚ REDOVNE AKTIVNOSTI

Tokom februara smo u sklopu naših redovnih aktivnosti radili na održavanju i razvoju komunikacija i koordinacije unutar Omladinske mreže Bosne i Hercegovine (www.omladina-bih.net). U okviru toga smo svakodnevno na mejling listu mreže (posta@omladina-bih.net), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH (pozivi na radionice, seminare, konferencije, pozivi za projektne aplikacije, poslovi, školarine, ostale aktivnosti), održavali i redovno dopunjavali informacije na našoj web stranici www.omladina-bih.net, slali informacije koje smo dobili od omladinskih organizacija i pojedinaca iz mreže prema vani (međunarodnim organizacijama, organizacijama u regionu, donatorima), vršili korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH.

PLANOVI HCA/ORG-A ZA MART 2015.

- Nastavak planiranih projektnih aktivnosti u okviru Prekogranične građanske mreže za mir, pomirenje i sigurnost ljudi na Balkanu, koji je podržan od strane Evropske Komisije.
- Sprovođenje redovnih aktivnosti kroz Omladinsku mrežu BiH.
- Koordinacija i priprema aktivnosti u okviru ALF mreže BiH.

Više informacija na našoj web stranici: www.omladina-bih.net

AKTIVNOSTI ČLANICA OMLADINSKE MREŽE BIH



OMLADINSKA ORGANIZACIJA "SVITAC"

Jusufa Čampare bb, 76 100 Brčko Distrikt

Tel./Fax: 049 211 032

Email: svitac@teol.net

Web: www.svitac.org

FB: www.facebook.com/omladinska.svitac

+ KREATIVNE RADIONICE

Kreativne radionice su nastavljene u februaru sa djecom iz Brčko Distrikta. Učesnici su uglavnom radili na temi "Moj zimski raspust", tako što su radili crteže temperama, akvarelnim i drvenim bojama i samoljepljivim kolaž papirom.

Radionice se održavaju ponedjeljkom, srijedom i petkom u terminu od 12:00-14:00 u Omladinskom centru Brčko Distrikt. Koordinator radionica su EVS i Weltwaerts međunarodni volonteri Tamara Wonner i Nicolas Zdun iz Njemačke, i John Streatfield iz Velike Britanije. Trenutno ima 45 učesnika uzrasta 4-12 godina.



+ JEZIČKE RADIONICE



Kursevi engleskog i njemačkog jezika su nastavljani u februaru. 30 studenata trenutno pohađa ove kurseve i podijeljeni su u tri grupe (Početni 1, Početni 2 za djecu i odrasle i Srednji 1 za djecu).

Svaka grupa ima dva časa sedmično u trajanju od sat i po, a časovi se održavaju u prostorijama Omladinske organizacije Svitac i Omladinskom centru Brčko distrikta. Starost studenata je od 8 do 35 godina.

► Radionica engleskog jezika „I love English”

Učesnici su na interaktivnim radionicama diskutovali na 4 do 6 tema koje bi zadao koordinator, te bi na taj način vježbali izgovor i neformalnu konverzaciju. Koordinator radionica je EVS međunarodni volonter iz Velike Britanije John Streatfield. Radionice se održavaju ponedjeljkom i srijedom u terminu od 19:00-20:00 u Omladinskom centru Brčko Distrikt. Trenutno ima 20 učesnika, uzrasta 15+.

► ŠTA IMA ?! (SPRECHEN-THEMEN- ARGUMENTIEREN) - Radionice njemačkog jezika

Interaktivne radionice njemačkog jezika su nastavljene nakon zimskog raspusta. Radionice su rado posjećene i veoma dobro isplanirane, i za one koji zaista žele nešto da nauče od velike su koristi. Trenutno ima 20 polaznika, uzrasta 18+.

Radionice se održavaju u Omladinskom centru, ponedjeljkom i srijedom od 20:00-21:00 časova. Koordinator radionica su međunarodni volonteri iz Njemačke Nicolas Zdun i Tamara Wonner.

SPORTSKE RADIONICE

Sportske radionice se održavaju tri puta sedmično u Omladinskom centru Brčko Distrikt. Broj učesnika varira i do 40, uzrasta 6+. Neke od aktivnosti su fudbal, igra "Graničara", odbojka, zaledi se. itd. Učesnici, posebno dječaci su oduševljeni sportskim radionicama, tako da se uvijek nađe dodatna zabava sa loptom ili jednostavno uživanje u timskim igrama. Koordinator sportskih radionica je Nicolas Zdun, međunarodni volonter iz Njemačke.

MUZIČKE RADIONICE

► Radionice gitare

Učesnici radionice gitare su nastavili rad kako na starim tako i na novim vježbama, duetima, etidama i kompozicijama.

► Radionice sambe

Uz zajedničko sviranje veliki dio vremena na radionicama sambe bio je posvećen ritmičkim igrama te prepoznavanju dužine trajanja različitih tonova i njihovih naziva. Ovakav rad nastavit će se i u narednom periodu uz učenje čitanja kraćih ritmičkih notnih zapisa.

► Hip-Hop radionice

Nakon kratke pauze i praznika radionice su bile slabije posjećene. Na radionicama se osim slušanja izvođača iz svijeta Hip-Hopa i pisanja stihova razgovaralo o mogućnostima za snimanje materijala pripremljenog na radionicama.



OTVORENI POZIV ZA VOLONTERE IZ BiH

Koliko dugo: 1 mjesec

Kada: 10. april - 10. maj 2015

Gdje: Don Bosco, Rijswijk, Holandija

Pozicije: 1 volonter (od 18-30 godina)

Krajnji rok za aplikacije: do popunjavanja pozicije

Za više informacija o volontiranju i kako aplicirati kontaktirati Maju Tomić na email:

maja.evs@gmail.com

Za mart se planira nastavak svih redovnih radionica Omladinske organizacije Svitac.



H.O. Muslimansko dobrotvorno društvo - **MERHAMET DOBOJ**
 Kralja Aleksandra 17, 74 000 Doboj
 Tel./fax: 053 226 886
 E-mail: merhamet.doboj@cutuk.net
 Web: www.ngo.ba; www.facebook.com/Merhamet-Doboj

✚ **AKTIVNOSTI H.O. „MERHAMETA“ DOBOJ U FEBRUARU**

- ZAHVALJUJUĆI H.O. "MERHAMETU" DOBOJ, KOLO SRPSKIH SESTARA „**MARIJA MAGDALINA**“ IZ PETROVA DONIRALO OPREMU KUD-U „GRADINA“ DOBOJ.
- DONACIJA BRAŠNA – „HIFA-OIL“ D.O.O. TEŠANJ I „MLIN NEZIĆ“ GRADAČAC.



- Predsjednica „Merhameta“ Doboj, Avdić Faketa i volonterka Amra Mišić prisustvovala radnoj konferenciji pod nazivom „Kako unaprijediti uslove života na poplavljenim područjima?“ koju su organizirali „NVO TOPEER“, „Transparency International BiH“ i Antikorupcijska mreža u BiH „ACCOUNT“. Pitanja o kojima se diskutiralo na konferenciji direktno su vezana za iskustva sa podjelom humanitarne pomoći stanovnicima poplavljenih područja, načinima odlučivanja i komunikacije kome i kako se dijeli pomoć, te o mehanizmima koji će osigurati regularnost i transparentnost tog procesa.



- H.O. „Merhamet“ Doboj uručio novčanu pomoć socijalno ugroženoj članici "Merhameta" Lukić Gospavi za kupovinu lijekova. Baka Gospava je teško oboljela. Boluje od Parkinsonove bolesti, tumora na mozgu...Živi od tuđe njege i moli sve ljude dobre volje da joj pomognu, jer jedva preživljava. Stoga, budimo humani, jer humanost je vrlina samo rijetkih i odabranih.
- Posjeta H.O. „MERHAMET-u“ Doboj, direktora Regionalnog Odbora „MERHAMETA“ Banja Luka, HALILOVIĆ FIKRETA i aktivista iz „MERHAMET-a“ Bosanskog Novog.

- Volonterke „Merhamet-a“ Doboj - Mirnesa Bećirodobašić, Amra Mišić, Suzana Ristić i članice „Merhamet-a“ Doboj - Asmira Omerčić, Elma Ahmić i Merdiha Omerčić uspješno položile obuku iz grafičkog dizajna, preduzetništva i ECDL-a START koju je organizovala NVO "Europlus" i dobile certifikat.



✚ **Svakodnevne aktivnosti „Merhamet-a“ Doboj tokom mjeseca februara obuhvatale su:**

- Praćenje javnih poziva za projekte,
- Evidencija novih članova,
- Pružanje informacija starim i bolesnim,
- Rad ambulante.



Udruženje Centar za edukaciju, informisanje i afirmaciju mladih "INPUT"
 Prvomajska b.b., 72 000 Zenica
 Tel./fax: 061 766 532
 E-mail: input.ze@gmail.com
 Web: www.input.tech.ba

✚ **INPUT-ovci sa djecom iz Dom porodica obilježili 1. mart**

Članovi INPUT-a su povodom Dana nezavisnosti posjetili JU "Dom porodica" Zenica gdje su se družili sa djecom. Druženje sa djecom je počelo intoniranjem himne, a nakon toga djeca su imala zadatak da crtaju na temu: Dan nezavisnosti BiH. Nakon toga najbolji radovi su nagrađeni, članovi INPUT-a su nastavili druženje sa djecom uz karaoke i edukativno kreativne igre gdje su izmamili veliki broj osmjeha kod djece. Mladi iz INPUT-a su na ovaj način uz pregršt zagrljaja djece obilježili 1. mart Dan nezavisnosti BiH.



Više o aktivnostima INPUT-a možete pronaći na: www.inputcentar.com i [FB stranici](#).

www.omladina-bih.net



www.pronibrcko.ba

PRONI CENTAR ZA OMLADINSKI RAZVOJ

Mehmedagića 24, 76 100 Brčko distrikt BiH

Tel./Fax: 00 387 49 217 695

E-mail: pronibrcko@teol.net

www.pronibrcko.ba

✚ PRONI na sastanku sa mađarskim parlamentaricama



PRONI Centar je u petak 20.2.2015. sudjelovao na sastanku sa mađarskim parlamentaricama koji u okviru Twinning projekta "Jačanje kapaciteta parlamenta u Bosni i Hercegovini u kontekstu integracija u EU" rade na povećanju učešća civilnog društva i vidljivosti uloge parlamenta u procesima EU integracija. Cilj ovog sastanka, održanog u Skupštini Brčko distrikta BiH, je za predstavnike i eksperte projekta iz Mađarske bio upoznati se sa dosadašnjim načinom rada i suradnje između zakonodavne i izvršne vlasti sa organizacijama civilnog društva u Brčkom sa posebnim fokusom na EU integracije.

Uključenost građana i civilnog društva u ove procese daje mogućnost za realističniji proces izrade zakona i bolje povezivanje sa društvom, a samim tim i povećani legitimitet za aktivnosti parlamenta na svim nivoima vlasti u BiH.

PRONI je na ovom sastanku istako svoje zalaganje za mlade te sistemsko rješavanje pitanja mladih u Brčkom kroz inicijativu za usvajanje i implementaciju Zakona o mladima Brčko distrikta BiH, Zakona o volontiranju, kreiranja adekvatnih prostora za mlade kroz Mrežu omladinskih klubova i iniciranje omladinskog centra. Prilikom predstavljanja našeg centra istakli smo naš rad na procesu pomirenja, te suradnju sa državnim i entitetskim tijelima pored suradnje sa Skupštinom i Vladom Brčko distrikta BiH.

Cilj projekta je jačanje uloge Parlamentarne skupštine BiH, Parlamenta Federacije BiH, Narodne Skupštine Republike Srpske i Skupštine Brčko distrikta u procesu pristupanja Bosne i Hercegovine Europskoj Uniji i provedbe Sporazuma o stabilizaciji i pridruživanju. Svrha projekta je ojačati kapacitete članova parlamenta i administracije parlamenta za strateško vođenje procesa pridruživanja EU.

Kao organizacija koja surađuje sa svim nivoima vlasti u BiH i ima partnere izvan BiH u cilju boljeg položaja mladih vrlo smo zainteresirani za ciljeve projekta, preporuke koje će proizaći iz ovih sastanka te učešće mladih u parlamentima.

✚ Mladi Brčko distrikta BiH na kafi sa donosiocima odluka

U okviru projekta ***Stand up and get lucky*** PRONI Centar sa partnerima organizira kafu sa donosiocima odluka u deset gradova Bosne i Hercegovine, a između ostalih i u Brčko distriktu BiH.

Kafa sa donosiocima odluka je poseban događaj namijenjen mladima i donosiocima odluka Brčko distrikta BiH. Mladi će kroz razgovor sa donosiocima odluka imati priliku dati konstruktivne sugestije za unaprjeđenje rada s mladima u Brčkom.

Gost prve „Kafe sa donosiocima odluka“ je šef odjela za stručne i administrativne poslove g-din. Tomislav Stjepanovic, a druge g-din. Damir Bulčević šef odjeljenja za privredni razvoj, sport i kulturu.



Mladi su govorili o nekoliko različitih pitanja koja smatraju važnim za unaprjeđenje rada s mladima u Brčko distriktu BiH. Pitanja pripravnčkog staža i načina rješavanja pitanja pripravnika sa visokom stručnom spremom, kako da mladi uspostave bolji dijalog sa pojedinačnim Odjelima Vlade Brčko distrikta BiH, pitanja podrške mladim talentovanim ljudima, pitanja izrade zakon o mladima i zakona o volontiranju, te načina na koji Vlada radi reviziju dosada utrošenih sredstava po pojedinačnim odjelima, ali učinka utrošenih sredstava posebno onih usmjerenih mladima. Pored svega navedenog mladi su dali i sugestije da se dio pripravnčkog staža može riješiti i volontiranjem prema trenutnom zakonu o radu, ali i prema budućem zakonu o volontiranju. I mladi i šefovi su podržali inicijativu ovakvog načina ostvarivanja dijaloga između mladih i vlasti, a PRONI će nastaviti sa pozivom drugim šefovima odjela da se i sami susretnu s mladima na ovaj način.

Napominjemo da je poziv za Kafu sa donosiocima odluka bio otvoren za sve mlade u Brčko distriktu BiH od 15 do 30 godina bez obzira jesu li aktivni u nekim udruženjima ili ne. Na dosadašnjim kafama je u grupi mladih bilo mladih iz tzv. grupe „budući pripravnici“, učenika iz tehničke škole, mladih aktivista Omladinske organizacije Svitac, volonteri iz Omladinskih klubova Brčko distrikta BiH i dr.



Stand up and get lucky projekat ima za cilj osnaživanje mladih u Bosni i Hercegovini da prepoznaju ključne probleme koji su prouzrokovani političkom situacijom i utiču na rješavanje tih problema podizanjem građanske svijesti i promoviranjem kulture demokratskog učešća u zajednici.

Ovaj projekt se implementira uz pomoć deset organizacija iz deset gradova/općina u Bosni i Hercegovini i to: Visoko, Goražde, Sarajevo, Mostar, Tuzla, Banja Luka, Foča, Brčko, Doboj i Travnik. Projekat sa partnerima implementira Udruženje "Mladi volonteri" Visoko sa partnerima, a finasira ga Ambasada Kraljevine Norveške u BiH.

PRONI Bijeljina na sastanku sa načelnikom za društvene djelatnosti Grada Bijeljina



17.02.2015. PRONI Centar Bijeljina, kao članica Omladinskog savjeta Bijeljina, je učestvovao na sastanku sa načelnikom za društvene djelatnosti, Slavkom Bašićem u cilju informisanja o novom načinu finansiranja nevladinih, omladinski organizacija i organizacija za mlade u Bijeljini. Gradska uprava želi unaprijediti rad uvođenjem novih metoda finansiranja organizacija kroz projekte, tako što će pojedine proglasiti za organizacije od opšteg interesa i kroz projektne grantove finansirate ih na godišnjem nivou. Na ovaj način Grad Bijeljina prepoznaje rad organizacija koje djeluju u Bijeljini za mlade dugi niz godina i koje imaju dobre rezultate svog rada.

Sastanak je održan u Centru za kulturu Bijeljina gdje je i smješten Omladinski savjet grada Bijeljine. Omladinski savjet Bijeljina je asocijacija omladinskih organizacija Bijeljine koju čine mladi ljudi sa jasnim i transparentnim stavovima i idejama. Mi zastupamo interese mladih omladinskih organizacija sa područja grada Bijeljine i doprinosimo razvoju Omladinske politike tako što usmjeravamo mlade na konkretan rad i saradnju sa omladinskim organizacijama.

PRONI domaćin volonteru iz Kraljevine Norveške

PRONI Centar za omladinski razvoj trenutno ima volontera iz Norveške. Norveški student Jørgen Wien će provesti 5 mjeseci u Brčkom i u PRONI-u kao volonter. Njegov rad u PRONI Centru i

boravak u Brčko distriktu BiH je dio njegovog magistarskog rada u polju antropologije, čiji je glavna tema pomirenje među mladima. Ideja projekta je istražiti pitanja pomirenja i suživota mladih u Brčko distriktu BiH kroz direktan rad s mladima.



Projekt će pored istraživanja o mišljenjima mladih zabilježiti i stavove odraslih o procesu pomirenja i primjer Brčko distrikta BiH, te kroz konkretne aktivnosti raditi na razmjeni kultura između Bosne i Hercegovine i Kraljevine Norveške. U PRONI Centru najveći dio posla za Jørgena će biti istraživanje i kurs norveškog jezika kako bi dao doprinos mladima i građanima Brčko distrikta BiH da upoznaju norvešku kulturu i jezik. Pored toga će pomagati u drugim aktuelnim aktivnostima PRONI Centra.

Jorgen je jezike Bosne i Hercegovine naučio na Balkanskim studijama u Oslu, a slobodno vrijeme i tamo provodi volontirajući u radu sa azilantima, imigrantima i drugim doseljenicima u Norveškoj. Sa njima je također radio kurs norveškog jezika i pomagao im upoznati kulturu zemlje u koju su došli.

✚ Volonteri Brčko i Bijeljina u mreži Volontiram

U Banja Luci je od 24. do 25. 02. 2015. održan sastanak mreže "Volontiram" u organizaciji OKC-a. Sastanak je dio projekta "Volonteri čine promjenu" u kojem je učestvovalo oko 15 predstavnika Lokalnih Volonterskih Servisa, među kojima je LVS Brčko i LVS Bijeljina. Na sastanku je sumiran dosadašnji rad mreže, razgovaralo se o mogućnostima angažovanja i animiranja volontera, o minimalnim standardima koji su potrebni za postojanje LVS-a kao i planiranju budućih aktivnosti mreže.

Vizija mreže "Volontiram!" je: Humano i ravnopravno demokratsko društvo koje aktivno uključuje građane u društvene procese.

Misija mreže "Volontiram!" je: neformalna mreža lokalnih volonterskih servisa Bosne i Hercegovine, koja kroz aktivnosti promocije i razvoja volonterizma doprinosi izgradnji društvenih kapaciteta kao uslov za poboljšanje kvaliteta života i razvoja zajednice u cjelini.



Strateški ciljevi Mreže "Volontiram!":

1. Uspostavljen i primjenjen pravni okvir volontiranja u BiH;
2. Volontiranje prepoznato i prihvaćeno kao pozitivna društvena vrijednost;
3. Uspostavljen jedinstven sistem volonterskog menadžmenta u BiH;
4. Jaka mreža Volontiram! koju čine održivi lokalni volonterski servisi u BiH;
5. Mreža Volontiram! prepoznata kao centar za informisanje, razmjenu iskustava i znanja i razvoj inovativnih metodologija na polju volontiranja na državnom i međunarodnom nivou.

Za više informacija o mogućnosti da vaša organizacija/institucija postane Lokalni Volonterski Servis molimo Vas da kontaktirate Omladinski komunikativni centar.



INSTITUT ZA RAZVOJ MLADIH KULT

Ul. 4. viteške brigade 34-36 BA, 71 210 Ilidža, Sarajevo

E-mail: kult@mladi.org

Tel.: 033 778 778; fax: 033 778 779

Web: www.mladi.org

+ Dajemo podršku mladim ljudima koji žele pokrenuti biznis i postati nezavisni

U obrazovno rasonodnom centru za mlade SPAJALICA u Ilidži 26.02.2015. godine održana je svečana ceremonija dodjele grantova za omladinsko preduzetništvo. Stručna komisija Instituta za razvoj mladih KULT tim povodom je odabrala Omladinsko udruženje REaktiv iz Zenice i Fondaciju tuzlanske zajednice iz Tuzle kao organizacije koje su zaslužno osvojile grantove.

Institut je prije godinu dana u saradnji sa Federalnim ministarstvom kulture i sporta radio veliko istraživanje položaja mladih u Federaciji BiH. Kroz opsežno istraživanje se pokazalo da čak 70% mladih ljudi smatra da im poslovni treninzi mogu koristiti u praksi. Na žalost istraživanje je pokazalo i da je samo 16 % mladih imalo priliku učešća na jednom takvom treningu. Također, preko 50 % mladih ljudi je istaklo kako bi pokrenulo vlastiti biznis ako bi za to imali podršku. Ta podrška, nije primarno finansijska, već mora biti i savjetodavna. Zbog toga ova inicijativa ima za cilj da podrži mlade ljude.



„Drugi fokus jeste da omladinske centre učinimo održivim i neovisnijim. Želimo dodatno pokazati omladinskim centrima da samostalno mogu biti inicijatori prikupljanja sredstava kako bi što lakše stvorili svoju održivost i nezavisnost, te radili na kreiranju vlastitih biznisa koji primarno moraju biti samoodrživi u lokalnoj zajednici i BiH“, posebno je naglasio Jasmin Bešić, izvršni direktor Instituta za razvoj mladih KULT

U okviru obuke za stručne saradnike i saradnice za rad s mladima koju provodi Institut za razvoj mladih KULT, a na osnovu poziva za dostavljanje biznis plana koji će biti realizirani u sklopu obuke Komisija Instituta je odabrala biznise koji će dobiti podršku za realizaciju poslovnog plana u pojedinačnom iznosu do 6.000,00 KM.

„Danas smo svečano potpisali Ugovore za realizaciju grantova u Zenici i Tuzli. Dodjelu grantova podržala je Američka ambasada u Sarajevu kroz projekat podržavanja zapošljivosti omladinskih radnika u lokalnim zajednicama. U proteklom periodu 24 omladinska radnika iz 12 lokalnih zajednica u BiH su imala priliku da prođu kroz obuku za preduzetništvo.“

Osnovi kreteriji za izbor biznis plana bili su samoodrživost, podrška lokalne zajednice i potreba za takvom vrstom biznisa u lokalnoj zajednici“, istakao je Igor Rejan Roić, projektni koordinator Instituta.



✚ Almir Mukača : „Nakon mnogo godina rada uspjeh dođe preko noći“

Gost sesije „Kafa sa“ u Obrazovno-raznodnom centru za mlade SPAJALICA u ponedjeljak navečer bio je Almir Mukača, čovjek koji ima mnogo životnih prioriteta, projekata i vizija, ali za sebe kaže da je jednostavno poljoprivrednik. Jedina razlika leži u tome što je Almir kao i cijeli njegov tim orijentisan na organsku proizvodnju isključivo domaćeg povrća. Upravo je zbog toga Almir u SPAJALICI govorio o zdravoj prehrani, organskoj proizvodnji i projektima poput „www.krompir.ba“ i „Zelenara“ koje uspješno vodi.



„Moja porodica se oduvijek bavila organskom proizvodnjom povrća, međutim mi nismo znali da se to tako zove, jer se taj pojam u Fojnici, kraju iz kojeg ja dolazim nije baš previše koristio. Nikada nismo koristili pesticide i hemijska gnojiva pri uzgoju našeg povrća jer smo proizvodili isključivo za vlastite potrebe i željeli smo da jedemo zdravu hranu. Ideja za pokretanje www.krompir.ba došla je jednog petka kada sam shvatio da trebam prodavati organski krompir koji bih dostavljao na adresu i to prvenstveno prijateljima u Sarajevo. Shvatili smo da sve to trebamo upakovati i baš tada se rodila ideja za „Zelenaru“ tj. kutiju punu povrća“, istakao je Almir tokom svog gostovanja u SPAJALICI.

✚ Održana regionalna konferencija u Banjoj Luci

U Banjoj Luci, 13. 2. 2015. održana je druga regionalna konferencija na kojoj su prisustvovali službenici/e za mlade, predstavnici/e nevladinih organizacija koji se bave pitanjima mladih, predstavnici/e vijeća mladih/omladinskih savjeta. Na regionalnoj konferenciji u Banjoj Luci promovirani su zaključci s međunarodne konferencije mladih kojom je obilježeno 100. godina od početka Prvog svjetskog rata, a koje su 120 mladih iz 22 različite zemlje donijeli u Sarajevu u junu i julu 2014. g. Mladi smatraju da su najvažniji elementi za mlade danas u svijetu: aktivno građanstvo, međunarodna saradnja i prevazilaženje etničkih barijera s ciljem sprječavanja novih sukoba, te promoviranja izgradnje održivog mira.

Na regionalnoj konferenciji Mlada Evropa u Banjoj Luci učesnicima/ama obratili su se gosp. Vladimir Pandurević, ispred Delegacije Evropske unije u BiH, gosp. Jens Wagner ispred Ambasade Savezne Republike Njemačke u BiH, predsjednik Omladinskog savjeta Republike Srpske (OSRS) Miloš Blagojević, koji je prezentirao aktivnosti OSRS-a, te predstavnica Instituta Nejra Neimarlija Roić.

Evropska unija je u svrhu obilježavanja 100. godišnjice od početka Prvog svjetskog rata dala podršku u iznosu od 2 miliona eura.

Cilj obilježavanja ove godišnjice jeste da se stavi fokus na ono što nas spaja, a ne ono što nas dijeli, što je poenta projekta Sarajevo 2014 podržanog od strane Evropske unije.

U aprilu održat će se treća i finalna regionalna konferencija u Tuzli. Nakon konferencije zaključci sve tri regionalne konferencije će biti objedinjeni i promovirani, a koji mogu poslužiti kao preporuke vladinom i nevladinom sektoru u angažmanu za boljitak mladih.





Omladinska novinska asocijacija u Bosni i Hercegovini - ONAuBiH

Mula Mustafe Bašeskije 7, 71 000 Sarajevo

Tel./fax: +387 33 205 850

E-mail: onaubih@gmail.com

Web: www.onabih.ba

FB: <https://www.facebook.com/onaubih>

PROJEKT: 'VIEWS'

U mjesecu februaru, počelo je emitovanje videa u sklopu projekta pod nazivom „Views“.

„Views“ je projekat koji za cilj ima izvještavanje o problemima s kojim se susreću mladi ali i ostali stanovnici 35 gradova u BiH, sve to putem video zapisa. Videi su kreacija aktivista/aktivistkinja Omladinske novinske asocijacije, te su produkt volje za pozitivnim promjenama kroz volonterizam. Snimanje i obrada videa su koštali OKM.

O problemu predstavljenom u prvoj epizodi izvještavaju naši volonteri iz Cazina. Stara cazinska Gimnazija se nalazi u izrazito lošem stanju, za šta je kriv nemar nadležnih. Danas, zgrada škole je napuštena, u ruševnom je stanju te služi za odlaganje smeća i kao prenočište za beskućnike.

Nažalost, ovaj primjer šalje sliku nemara lokalnih vlasti, koje ne poduzimaju ništa po pitanju obnavljanja zgrade, koja bi se mogla koristiti u razne pozitivne svrhe.

Problem predstavljen u drugoj epizodi dolazi iz glavnog grada BiH - Sarajeva. Ovaj primjer ugrožavanja sigurnosti pješaka nije učestao samo za predstavljeno mjesto zbivanja radnje (Marijin Dvor), već za čitav grad. O tome da video materijal nije snimljen iz jednog ili dva navrata, govori i ironična činjenica da na poznatom Google Maps sajtu se na prikazu Zemlje mogu vidjeti auta parkirana na istom mjestu.

Pješaci su primorani hodati po kolovozu, jer je trotoar, koji je namijenjen za siguran prolazak pješaka, pretrpan vozilima i to u periodima kada se najveći broj ljudi kreće upravo ovom relacijom. Situaciju gorom čini i konstantni prolazak autobusa, pa je manevrisanje između automobila koji su parkirani i automobila i autobusa koji prolaze kolovozom čak i opasno po život

Najveći problem u cijeloj priči predstavlja nemar osoba zaduženih za sprovođenje zakona i regulisanje saobraćaja (policajaca i policajki) čija stanica se nalazi svega nekoliko stotina metara od spornog mjesta.

Videi će se u budućnosti emitovati svakog utorka u 20:00 h.

Linkove možete pronaći na našem fan page-u <https://www.facebook.com/onaubih>

NOVI ČLANOVI



JEDINSTVENA ORGANIZACIJA MLADIH

Ulica Titova bb 74 264 Jelah

Tel./fax: 032 664 114

E-mail: jom_jelah@hotmail.com

Web: www.jom-jelah.org

FB: <https://www.facebook.com/Jedinstvena.organizacija.mladih>

Kratak istorijat organizacije

Jedinstvena organizacija mladih je nevladina, vanstranačka, neprofitna i multinacionalna organizacija društveno odgovornih svjesnih mladih ljudi i ostalih građana, koja radi na organizovanju edukativno, kulturnih, sportskih i informacionih sadržaja, te u saradnji i partnerstvu sa svim sektorima društva izgrađuje vlastite kapacitete, jača lokalnu i širu zajednicu.

Vizija organizacije:

“Ostvarivanje socijalne jednakosti i pravde građana u ruralnim i urbanim sredinama na lokalnom i regionalnom nivou.”

Misija organizacije:

“Izgradnja kapaciteta kroz kreiranje i jačanje partnerskih odnosa i mrežne saradnje unutar i između osnovnih sektora društva.”

Osnovana je 2002. godine. Trenutno broji oko 50 članova svih nacionalnosti. Članovi JOM-a su realizovali preko 20 projekata u više sektora društvenog života i različitog sadržaja (muzičkog, kulturnog, sportskog, informacionog, ekološkog, humanog, edukativnog, i dr.). Svi ovi projekti su realizovani s ciljem unaprjeđenja kvalitete življenja i razvijanja urbanijeg načina razmišljanja kod mladih ljudi i ostalog stanovništva na lokalnom nivou.

Naše trenutne aktivnosti su usmjerene u nekoliko programskih područja: neformalno obrazovanje i cjeloživotno učenje, zapošljavanja i tržišta rada, umjetnost i kultura, interkulturalnog dijaloga i društveni aktivizam, zaštita okoliša i sport. Aktivno radio na razvoju ključnih kompetencija mladih, razvoj karijere i informisanje mladih, podsticanje i osnaživanje mladih da aktivnije volontiraju u svojim lokalnim zajednicama, umrežavanje sa ključnim akterima iz biznis, civilnog i javnog sektora, pružanje podrške i nadzor mladih ljudi u planiranju i realizaciji različitih projektnih ideja i inicijativa usmjerenih na društveno-ekonomski razvoj na lokalnom nivou.

Primarni programski ciljevi organizacije:

- izgradnja kapaciteta kroz organizovanje edukativnih radionica i drugih vidova neformalnog obrazovanja;
- animiranje i stvaranje navike kod građana da aktivno učestvuju u svim sferama života i rada zajednice u kojoj žive;
- socijalna integracija građana unutar i između osnovnih sektora društva kao vid smanjenja nacionalne i regionalne i sektoralne polarizacije;
- promovisanje tolerancije, mira, humanih odnosa, opštih ljudskih prava i sloboda, integracije;
- multikulturalnosti i ideje izgradnje povjerenja i kvaliteta zajedničkog življenja;
- zalaganje za poboljšanje pravnog, ekonomskog i društvenog položaja mladih u društvu kao i za uzdizanje ekološke svijesti pojedinca i društva;
- kreiranje i razvoj radionica i malih preduzeća na bazi privredno – društvenih djelatnosti.

INFORMACIJE / DONATORI / POZIVI

1. Poziv za dostavljanje projektnih prijedloga

“In fondacija” objavljuje javni poziv za NVO registrovane u BiH, koje imaju znanja i iskustva u radu s djecom da pripreme projektne prijedloge usmjerene na jednu od dvije teme:

“Sigurnost na internetu”- Ref.br.poziva INFIS 2/2015

ili

“Prevenција rodno zasnovanog nasilja”- Ref.br.poziva INFPGBV 3/2015

Projektne prijedlozi bi trebali biti inovativni, uključujući metodologiju i pristup koji odgovara ciljnoj grupi, i trebalo bi da doprinose povećanju sigurnosti u životima djece u BiH. Mobilizacija volontera, zagovaranje za promjene u zajednici i promocija aktivnog učešća korisničkih grupa trebaju također biti komponente projekta.

Aktivnosti koje se budu provodile u školama bi trebale biti kreirane na način da osposobe osoblje škole da samostalno provodi te aktivnosti nakon određenog vremena projektnih intervencija.

Predloženi budžet trebao bi biti u rasponu od 5.000 - 20.000 Eura. Vlastiti doprinos organizacije ili doprinos iz drugih izvora je prednost i uzeće se u obzir prilikom razmatranja budžeta i tokom procesa selekcije.

Trajanje projekta zavisi od projektnih aktivnosti i očekuje se da projekti traju najduže 12 mjeseci.

Sve dodatne informacije, kao i obrasce za prijavu, uključujući i listu obaveznih popratnih dokumenata, kao i informacije o kriterijima za finansiranje, možete naći na našoj web stranici:

<http://www.infondacija.org/kriteriji-za-finansiranje>.

Organizacije koje budu uspješne imaće priliku, nakon prvog projektnog perioda, da apliciraju za finansijsku podršku naredne dvije godine, pod uslovom da postignu zadovoljavajuće rezultate u prvoj godini ciklusa i da donator bude imao obezbijeđena finansijska sredstva. Molimo da u obrascu za prijavu navedete referentni broj poziva koji je naveden uz naziv jedne od ponuđenih tema poziva.

Krajnji rok za dostavljanje aplikacija je ponedjeljak, 30. marta 2015. do 12.00 časova, isključivo poštom (ne prihvatamo dostavu brzom poštom), **na adresu:**

In fondacija
P.P. 45,
78 102 Banja Luka

2. NORVEŠKA AMBASADA:

Poziv za dostavljanje prijave – Fond za jačanje civilnog društva 2015

Norveška ambasada u Sarajevu objavljuje poziv za podnošenje prijave za dodjelu donacija iz Fonda Ambasade za Bosnu i Hercegovinu. Pomoć se daje na godišnjoj osnovi. Trajanje projekta ne smije biti duže od 12 mjeseci, a vrijednost ne smije biti veća od 100.000 BAM. Fond ostaje otvoren dok sva raspoloživa sredstva ne budu potrošena. Informacije o zatvaranju Fonda Ambasade za 2015. godinu bit će objavljene na našoj internet stranici.

Prijave moraju biti u skladu sa ukupnim ciljevima i specifikacijama navedenim u daljem tekstu. U slučaju prijave koje ne ispunjavaju uvjete Fonda Ambasade, Ambasada vas upućuje na druge šeme norveških donacija usmjerene za Zapadni Balkan. Molimo potencijalne podnosiocima prijave da se

upoznaju sa ovim uputstvima kako bi znali koja prijavna šema je ispravna u zavisnosti od prioritetne oblasti i veličine dotičnog projekta.

Informacije o drugim programima/fondovima možete naći [ovdje i ovdje](#).

Prioriteti za Fond Ambasade za 2015. godinu jesu aktivnosti kojima se podstiče:

- Mir i pomirenje pomoću kulture i umjetnosti, sporta, zapošljavanja, edukacije ili drugih aktivnosti.
- Demokratizacija, nezavisni mediji i sloboda govora.
- Reforma pravosuđa, uključujući borbu protiv korupcije.
- Reforma sektora sigurnosti i odbrane.
- Ekonomski razvoj i otvaranje novih radnih mjesta.
- Nacionalne manjine, djeca, invalidne osobe, mladi i žene su naročite važne ciljne grupe.
- Čista energija i klimatsko prilagođavanje.

Treba istaći sljedeće:

- Ravnopravnost spolova mora biti uključena u sve projekte i aktivnosti.
- Određeni stepen volonterizma treba uključiti u projektne aktivnosti.
- Nepotizam u procesu zapošljavanja neće se tolerisati.
- Nulta tolerancija za djela korupcije u projektima koje podržava Ambasada.

Pravo prijave

Institucije i organizacije iz javnog sektora i civilnog društva imaju pravo prijave. Pojedinci ne mogu podnositi zahtjev.

Generalno, sljedeći troškovi se neće pokrivati iz donacije:

- Finansiranje izvoza, uvoza ili plasiranje na tržište roba ili usluga.
- Tekući troškovi osim inicijalnih troškova u fazi osnivanja obično se neće pokrivati.
- Započinjanje aktivnosti u Norveškoj.
- Razvoj ili testiranje novih tehnologija.
- Transport humanitarne pomoći.

Podnošenje prijava i proces selekcije

Podnosioci prijava moraju popuniti formular za pomoć projektima koji se može naći [ovdje](#)

Ostali obavezni dokumenti su:

- Budžet – Koristite formular za budžet sa detaljnijim instrukcijama koji se može naći [ovdje](#)
- Instrukcije za plaćanje – Ime podnosioca prijave (organizacije), adresa podnosioca prijave, kontakt detalji (telefon, email), ime, funkcija i potpis ovlaštene osobe (pravnog zastupnika), ime banke u kojoj podnosilac prijave ima otvoren račun, broj računa.

Ambasada prednost daje kratkim i konciznim prijavama. Ukupan broj strana koje se podnose ne smije biti veći od 5. Prijave treba slati elektronski putem e-maila na.projects.sarajevo@mfa.no.

Iz Fonda Ambasade obično se daje pomoć projektima koji traju najviše godinu dana i ne prelaze 100.000 KM. Ako je prijava odobrena, priprema se Ugovor u dva primjerka. Oba primjerka Ugovora potpisuje osoba ovlaštena da zastupa primaoca donacije. Jedan primjerak zadržava primalac donacije, a drugi se šalje u Ambasadu. Postoji mogućnost da Ambasada Kraljevine Norveške u Sarajevu isplati dogovoreni iznos u KM u dvije rate ako se aktivnosti protežu na period od 12 mjeseci. Podnosilac prijave je obavezan da odmah obavijesti Ambasadu ako dođe do većih promjena u dogovorenom planu rada tokom izvođenja projekta. Svaku značajniju promjenu Ambasada mora odobriti unaprijed.

Moguće je da predstavnici Ambasade posjete projekt tokom realizacije ili po završetku projekta. Od primalaca sredstava se očekuje da učestvuju na godišnjem sastanku u organizaciji Ambasade. Eventualni troškovi vezani za ovo učešće trebaju biti uključeni u projektni budžet. Norveška ambasada također želi obavijestiti podnosiocima prijave da broj prijave za dodjelu donacije uveliko prevazilazi budžet Fonda Ambasade

3. KONKURS ZA PREKO REGIONALNE GRANTOVE

Imate li ideju o projektu koji može donijeti pozitivnu promjenu u zajednici, ne samo u vašoj zemlji, nego i u regionu? Može li se vaš projekat provesti putem prekoregionalnog partnerstva?

Fond OPEC-a za međunarodni razvoj (OFID) i Razvojni program Ujedinjenih nacija (UNDP) pozivaju neprofitne organizacije iz Evrope, Srednje Azije, Bliskog Istoka i Sjeverne Afrike da podnesu svoje projektne ideje na konkurs za prekoregionalne grantove, te zajednički razviju, testiraju i razmijene inovativna rješenja za razvojne izazove u dva regiona.

Dva tematska prioriteta konkursa su:

Prioritet 1: *Dostupna rješenja u oblasti energije i vode* - tehnološka rješenja za borbu protiv ograničenja pristupa energiji ili vodi;

Prioritet 2: *Ekonomsko upravljanje i zaposlenost* – odgovor na potrebu za inkluzivnijim tržištem rada i jačanjem mogućnosti građana da mu pristupe.

Grantovi u iznosu od \$ 20,000 do najviše \$ 55,000, u trajanju od godinu dana, će biti dodijeljeni neprofitnim organizacijama iz sljedećih zemalja:

Bliski Istok i Sjeverna Afrika: Džibuti, Egipat, Jordan, Liban, Maroko, Somalija, Palestinska država, Sudan, Sirija, Tunis, Jemen.

Preferencija će se dati prijavama nevladinih organizacija iz, ili onima koji budu uključivali nevladine organizacije iz: Džibutija, Maroka, Somalije, Palestinske države, Sudana, Sirije i Jemena.

Evropa i Centralna Azija: Albanija, Armenija, Azerbejdžan, Bjelorusija, Bosna i Hercegovina, Bugarska, Gruzija, Kazahstan, Kosovo*[1], Kirgistan, Moldavija, Crna Gora, Rumunija, Srbija, Tadžikistan, Bivša jugoslovenska republika Makedonija, Turska, Turkmenistan, Ukrajina, Uzbekistan.

Kako se prijaviti?

OFID – UNDP konkurs za prekoregionalne grantove ima dvije faze podnošenja prijave:

1) Faza izražavanja interesa

Potencijalni aplikanti ukratko objašnjavaju svoju projektnu ideju u skladu sa iskustvom i kvalifikacijama svoje organizacije. Ispunjavaju Aneks A – Formular za izražavanje interesa i podnose ga do 30. marta 2015. godine (17h00, GMT+2). Uz formular je potrebno poslati i kopiju certifikata o registraciji prevedenog na engleski jezik koji ističe da organizacija ima neprofitni status na email adresu: crgrants.irh@undp.org.

2) Faza kompletne aplikacije

Nakon povoljne selekcije u fazi izražavanja interesa, aplikanti uspostavljaju ili ojačaju partnerstvo sa još najmanje jednom organizacijom iz drugog regiona koji učestvuje u konkursu. Oni zajedno razviju detaljan prijedlog projekta kao što je zatraženo Aneksom B – Kompletan aplikacioni formular i Aneksom C – Budžetom. Pored toga, potrebno je da svaki od partnera ispuni Aneks D –

Pismo namjere i pošalje ga zajedno sa kopijom certifikata o registraciji. Sve dokumente je potrebno poslati na adresu crgrants.irh@undp.org do **31. maja 2015.** godine (17:00, GMT+2).

Više detalja o konkursu OFID – UNDP za prekoregionalne grantove možete naći u [smjernicama](#). Za sve dodatne informacije možete kontaktirati Tim za upravljanje grantovima direktno putem e-mail adrese: crgrants.irh@undp.org

http://www.ba.undp.org/content/bosnia_and_herzegovina/bs/home/presscenter/vijesti/2015/02/03/cross-regional-grants-competition/

4. JAVNI POZIV ZA PRIJAVU posebnih potreba i projekata od interesa za Hrvate izvan Republike Hrvatske

U cilju promicanja veza i jačanja suradnje Republike Hrvatske s Hrvatima izvan Republike Hrvatske te očuvanja hrvatskog identiteta, odnosno promicanja hrvatskog jezika, kulture, tradicije i jačanja položaja hrvatskog naroda izvan Republike Hrvatske, kao i pomoć ugroženim pojedincima – pripadnicima hrvatskog naroda izvan Republike Hrvatske, Državni ured za Hrvate izvan Republike Hrvatske u 2015. godini objavio je Javni poziv za prijavu posebnih potreba i projekata od interesa za Hrvate izvan Republike Hrvatske.

Javni poziv je namijenjen sljedećim kategorijama primatelja:

- 1) Neprofitne organizacije izvan Republike Hrvatske i u Republici Hrvatskoj (udruge građana, zaklade, ustanove i ostale organizacije koje ne ostvaruju dobit ili profit za svoj rad), kao i hrvatske zajednice izvan Republike Hrvatske koje se brinu za zaštitu prava i interesa Hrvata izvan Republike Hrvatske
- 2) Fizičke osobe čiji projekti obuhvaćaju brigu za očuvanje i jačanje identiteta Hrvata izvan Republike Hrvatske
- 3) Ugroženi pojedinci – pripadnici hrvatskog naroda s prebivalištem izvan Republike Hrvatske koji se nalaze u teškim socijalnim i materijalnim prilikama.

Javni poziv otvoren je do **18. ožujka 2015.** a rezultati će biti objavljeni na službenoj internetskoj stranici Državnog ureda www.hrvatiizvanrh.hr.

5. FONDOVI ZA OMLADINSKI ANGAŽMAN

Omladinski angažman ima važnu ulogu u pokretanju zajednice i poticanju razvoja, jer podrazumijeva uključenost mladih u rješavanje mnogih pitanja za poboljšanje vlastitog položaja, ali i cjelokupne zajednice. Dok se većina mladih u Bosni i Hercegovini opisuju kao pasivni, ostaje zanemarena činjenica da mladi ljudi često nemaju potporu, ni usmjerenje, u svojim zajednicama kako bi ostvarili promjenu, zbog čega mnoge njihove želje i ideje ostaju neostvarene.

Kroz omladinski angažman mladi pokazuju da su ključni resurs svojih zajednica, uključuju se u odgovorne i izazovne akcije, i preuzimaju ulogu aktivnih građana. Fondacija SHL nudi financijsku i mentorsku podršku mladima, posebno onima koji nisu imali iskustva u omladinskom angažmanu, da svoje ideje pretvore u stvarnost. Mladi diljem Bosne i Hercegovine vode omladinske kampove i sastanke, regrutiraju volontere, prikupljaju novac u humanitarne svrhe, organiziraju sportske i kulturne događaje, savjetuju i daju podršku svojim vršnjacima, te na razne načine utječu na svoje zajednice. Pritom stječu organizacijske i leaderske sposobnosti, praktična iskustva i aktivno sudjeluju u donošenju odluka.

Za finansijsku potporu Fondacije SHL mogu aplicirati omladinske organizacije, neformalne grupe i pojedinci kroz dva oblika podrške – Fond omladinskog angažmana (namijenjen lokalnim inicijativama u Bosni i Hercegovini) i Movements Across Borders (fond za prekograničnu suradnju mladih iz Bosne i Hercegovine i Srbije).

Prijavne obrasce trebate prvo snimiti na vaš računar, pa onda početi sa popunjavanjem.

[Info o programu FOA](#)

[Prijavnica FOA](#)

[Info o programu MAB](#)

[Prijavnica MA](#)

Link: <http://shl.ba/index.php/lat/omladinski-angazman>

Dragi prijatelji,

Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.

Rok za dostavljanje informacija za svako naredno izdanje je 30.-ti u mjesecu.

WEB Stranica Mreže:

sCh design

Webmaster:

Emir Delalić-Zeko -
Tuzla

emir.delalic@gmail.com

web: www.omladina-bih.net

mejling lista Mreže:

posta@omladina-bih.net

Adrese za slanje vaših informacija za mjesečni bilten:

hcatuzla@bih.net.ba; orctuzla@bih.net.ba

fax: 035 258 077

Omladinski resursni centar Tuzla

Hadži Bakirbega Tuzlića 1,
75000 Tuzla

tel / fax: 035 258 077

e-mail: orctuzla@bih.net.ba

hcatuzla@bih.net.ba

Mjesečni bilten uređuje Omladinski resursni centar - ORC Tuzla